

KARATIA

Karatia maqusanaasa Pauroofa akara rumannimufa maridanoo.

¹ Qinee Pauroosa Yisufa diqiqoo fasiqausa maridaqa maa pasana akara rumanni-maqaidaqa. Sia faiqí faiqi moo fannoo qini mareeqee Yisufa niqiqoo saikanaki quqaqoosa maridaqa, sia Anutufa moo fasiqara qufanoo qini mara quqanau. Anutuna asauku mundirafa Yisufa faqa narí akoona Anutuna faqa Yisuna kuqiranakinaana uqeera quqoofa miqandakai qini rafaqaqafusee mara quqaqoosa maridaqa maa saikanara qidaqa.

² Maaqoo maria nikaqaafasaasa dadaaqida inni Karatia maqannaasa nimandaيداqa, Karatia maqa maaqaki Yisuna ufara suqimariasa inni nimandaيداqa.

³ Maasa aiqamausa qikoofa Anutufa faqa mina asauku mundirafa Yisufa maasa Karaambaiqa faqa Anutuna idaaqira amiqi amiqirana faqa naundura asooarana faqa inni nimiani.

⁴ Maasa qikoofa Anutufa qufanoo asauku mundirafa iriseenoo eedoo qimaseenoo mi mau finau maqee kamuqoo marunna mandainaina afeekaikiranakinaana maasa idukuageera narafaqa maasa mandainaina akiaqara aunirira saqarisaa paasoosamasee quqanau.

⁵ Anutuna areenarana faqa amooqirufa faqa naaru naaru amimariani, doo miqiani.

Sia moo amiqira fasaasa ufa maridanoo moodaa kai.

⁶ Oo Karatia maqannaasa qinee inni oosanara tautummiqa. Innee dauni aaqee uqanna Anutuna minnisaafaqa qinee minara iriseeqa tautiqa, mifa narasauku mundirana idaaqirana kaqi nimiranannai inni naarama quqasoofaqa innee aaqee uqanna quqasee sandeeqa moo amiqira fasaasa ufara foora randoofaqa iriseeqa tautiqa.

⁷ Sia moo amiqira fasaasa ufa maridanoo moodaa kai maridanoo, faiqi anaasee akaqausa asauku mundirana amiqira fasaasa ufa qumaree mareeqee kaqinni ubeekeeqa minannai furufarirana inni nimimariafanoo.

⁸ Indaaru maasa Yisuna amiqira fasaasa ufa inni qimannimifannana doo maqee maasee moo fannoo fee innaarunaindaraa qangiroomoo fannoo fee moo fuka aaqee maria fasaasa ufana qimannimufaqqee Anutuna aqurarara ufa misasaa mariannoo.

⁹ Maasa ooqai qimannimifannanasaa kafaamaqee qimannimidaqa, moo fannoo maasa ooqai qimannimifannana moosaa qimasee qimanniminafa mifa Anutuna aqurarara ufa ameemaanai mariannoo.

¹⁰ Faiqi nifusaa qeeqa qimoofee qida fee nasurida fee miqi qidaqqee oo sia uqanna qinee miqianaura. Anutuna kuqaa eedoo qira ufara qinee randaidaqa. Qinee faiqi nifusaa fifau nasuridaqa miqi qidafau sia asauku mundirana ainainiranaki marini maqee maqee qini darirara kai qiafaqa moo ainainiranaki funaiqini.

Pauroofa Yisufa niqiqoo fasiqausaikammafi oosana aroo ufafa.

¹¹ Oo qini qikaqaafasaauga qinee maa ainainnara qimannimiana. Qinee qimannimianna fasaasa ufana sia faiqi auquqoofa maridanoo.

¹² Sia faiqikinaana qinee mareega, sia moo fannoo qimaqimifaqa iriqa asauku mundirafa Yisufa narí uqanna kooroomambi qimaqiminau.

¹³⁻¹⁴ Qinee ooqai kumaaraa mariafana Yuda maqannaa amaana ufa amiqimandee firaqoo qimariqiafana. Qinee Yuda maqannaasa amaana ufara qeeqa qikiaqauqa urinnaaqaramasee mi ainainna qiqiafana. Qinee misa urinnaaaramasee firaqoo maasa qikeeku qikaaku oosana maraqiafana. Qinee minaki fidaqa Anutuna ufara faqa Yisuna ufara faqa suqimarusa sia nifauqiafana afeekaikamandee misa mandaikamma nimaqiafana. Qinee minara amiqimandee taikaanee qidaqa mandaikamma nimaqiafana.

¹⁵ Anutufa sia qini mandoosanara irinoo narí idaaqira amiqi amiqira mariranaki marinoo qini qinoofa sia qini maqoo kamuqoo narí ainainira saikaki marianifeera ooqai indaaru qini daarama mi saikanaki quqaqisoofaqa kisaagasaa sia iriqiafana, mana mana kai qiqiafana.

¹⁶⁻¹⁷ Anutufa qiniara narí amiqira fasaasa ufa aanaamuru qimannimianne qimaseenoo Damasakusa maqusai fimariafanna aanasaa narí amaaku qini uqaqifiqanau. Uqaqifiqasoofaqa sia moo fasiqunnai oonureega Yisuna aufakiana iriqa, narí amaaku uqaqifiqaanee

qimaseenoo sia Yisufa niqiqoo fasiqusakina ooqai marusakina Yeerusareenni sia ooruree iraaanaqa qimaqimiqaau. Sia qinee miqi qiafana qinee andeeqasee quandaki Arabia maqa maaqai oonu marikiqa oonu randeeqa anireeqa kafaa Damasakusa maqusai fiqiafana.

¹⁸ Yisufa indaaru kooroommaqqooqoogari qaaramoo aukuana aiqarammafufaqa Yeerusaree maqusai ooruree Peetooroo funnai mina qafamasee aqoondikianauree qimaseeqa mina faqa qaara amaana maraqiafana.

¹⁹ Mi kamuqoo sia Yisufa niqiqoo fasiqausa nindafaqiafana misakiqari Yisuna akaqa Yameesana mina kai qafaqiafana.

²⁰ Qinee maa akaranakinaa ufa anoona kai qidaqa sia unna ufa qidaqa. Faiqi sia Yisuna fasaasa ufa qimaqimiqaau, Yisufa nari kai qimaqiminau. Anutuna afusaa maridaqa anoona ufa kai qidaqa.

²¹ Qinee Yeerusareenni qaara amaana maraseeqa Siria maqa maaqaki faqa Sirisia maqa maaqaki faqa oonu kisaqasaa mariqiafana.

²² Mi aukuanna mi kamuqoo Yudeea maqa maaqaki maridaqa Yisuna ufara suqimarusa sia qini qiqafaqaau.

²³ Akaqausa qiniara qimannimunara irimarusa kai mariqau. Misa maaqimandee qiniara qimannimiqaau. Maasa mandaikamma qimiqeemaru fasiqafa doo maqee quandaki nari naru taikee maru ufana qimannimidanoo.

²⁴ Misa mi ufana iriseeqa Anutufinnai qiniara dufi dufi qimariqau.

2

Pauroofa niqiqoo fasiqausaki sia qinee oorudupirausee qidanoo.

¹ Qinee Pauroosa Siria maqa maaqaki faqa Sirisia maqa maaqaki faqa kisaagasaa qisaukuqara taikasee qikunni qaara faqa qaara faqa oogu marasee aukwana maraseeqa Baranabasina faqa Titusana faqa nifiqamareeqa Yeerusareenni ooru fiqiafana.

² Anutufa nari maraḡunannai kukeeqasee qimaḡimunara ooru fiqiafana. Miḡoo ooruree Yisuna ufara suḡimarusa misa uriḡararausa faqa kai ufa qidaqa, aanaamuru Yisunara qimannimi-afannufana oosana oosana qimannimiḡiafana. Misa sia irifaqa qini saika ooḡai faqa maḡee faqa sia amiḡimandee qini dooki iriranaki qaoo qifooru minara qinee qimannimiḡa.

³ Qini qiqoondi Titusafa aanaamuru Kirisa maḡusaindari qini faqa Yeerusaree maḡusai ooru marufaqa Yuda maḡannaasa Yisuna ufa irimarusa minara maasa sia Yuda maḡannaanaanna ramasee Titusana fainanduḡaneera qiqau, kaqi mana mana imariḡau.

⁴ Faiḡi akaḡausa Yuda maḡanna unna qimasee Yisuna ufara suḡimarunausee qimasee maasaki umee ani keeqafufaqa Titusana qafammasee mina fainanduḡaḡee qufaqa maasa qaoo qiqiafana. Misa nipuraraa fasiḡara foora kukeeqasee maasaki ani keeqee mariḡau. Maasa Yuda maḡannaasa faqa aanaamuru faqa asaku mundirana Yisunaki marunara sia nariara nariara rufieeqa amiḡi mandee

moodaanaki Mooseena sandufakiqari idukiara foora marunara nipuraraa fasiqara foora minaki ani keeqafufaqa maasa mareeqee Mooseena sandufaki rumberanakiara foora kafaqa quqaaneera nipuraqau.

⁵ Maasa sia misa ufara eedoo qiqiafana. Inni aanaamuru mariasara iriseeqa sia eedoo qimasee Titusana fainanduqiafana. Yisuna amiqira fasaasa ufa anoona ufara kai innee aanaamuru mapukusee maraaqee qimasee sia misa ufa fainanduqirufa iriqiafana.

⁶ Qinee Pauroosa Yeerusareenni ufa qimarunaki maridaqa Yisuna ufara suqimarusakaki maridaqa faiqi misara uriqararausee qimarusa faqa ufa qimarufaqa iriafanaqa sia moomau fiqau qinee fimariafannamau mi mau kai fiqau. Qinee faiqi misara uriqararausee qiqa, Anutufa sia faiqi nifaaqa qafamaseenoo uriqararausee ureeqarausee qidanoo minara qinee sia uriqararausee qiqa sia ureeqarausee qiqa amana amana kai mariaa maqi qimasee qeeqa aanaamuru faiqi aanaaseeki saika maree marunnana kooroomasee paasoosamandee kaqi qimannimiqiafana. Qimannimifanaqa uriqararausee qimariasa sia qaoo qimasee moosaa fiaanoo qiqau.

⁷ Misa qiniara maaqi qiqau, ooqai Yisuna amiqira fasaasa ufa Yuda maqannaasa qimannimirafa Peetooronasaa Anutufa quqanau, doo maqee kamuqoo mifa aanaamuru mi ufanakai qimannimirafa qini Pauroonasaa quqee maqi qimasee maanara faqa irimariqau.

⁸ Anutuna afeeka fannoo kai Peetoorona mara

quqa amufanoo Yuda maqannaasaki fidanoo qimannimainau, miqi kai inoo Anutuna afeeka fanoo qini Pauroosa mareeqeenoo aanaamurukina mara quqasoofaqa fuafannaqa minara faqa irimariqau.

⁹⁻¹⁰ Yisuna ufa irimariasasa uriqararausara foora mariasa Yameesafa faqa Peetooroona faqa Yoohaneefa faqa qini ufa iriseeqa maaqi qiqau. Oo kuqaa Anutufa ani mareeqeenoo kuqaa aanaamuruki quqeenoo, anee aanaamuruki ainaininaqa maasa Yuda maqannaasaki ainainianauree qimasee qini faqa Baranabasina faqa nisauku ruqunnaseeqa doo fuagee qimasee moodaa ufa kai maaqi kai qimasee qimaqimiqau. Inneeqara Pauroosa faqa Baranabasina faqa Yudeea maqa maaqaki maria kudi fasiqausara Yisuna ufa irimariasasa maqee maqee iridaqa dadaaqiaqa. Miqi qufaqa qinee iriseeqa maaqi qiqiafana, qinee minara kai afeekaikianauroo fee qiqa. Mi ufa suqirana Yeerusareenni maridaqa qimaqimiqau.

Pauroofa Antiooka maqusai maridanoo Peetooroona aqinau.

¹¹ Doo miqooqari moo aukuaana ai randoofaqa Peetooroofa Antiooka maqusai qinee mariafan-naqoo aniroofaqa qinee aiqamausa nifusaa Peetooroona afusaa aqiqiafana, akooqoo mifa aaqamasoonara afusaa aqiqiafana.

¹² Yuda maqannaasa nari sandufa qiqa aanaamuru mariasa faqa sia moodaanaki misa saimbaqa narana naanauree qiqau. Peetooroofa Antiooka maqusai maridanoo misa Yuda maqan-

naasa sandufa rukiaseenoo miqooqaraa aanaamuru Yisuna ufa irimariasee qimaseenoo maqee maqee misa saimbaqa moodaaqoo ooqu marifidanoo narana nee marinau. Miqinoo marufanoo Yameesafa Yeerusaree maqusai maridanoo akaqa Yuda maqannaasa niqiqoofaqa Antiooka maqusai ooqu fiqau. Misa ooquroofanoo Peetooroofa nindafamaseenoo rufiamareenoo aadumai nianasaa oonu ooqu marifufanoo qimirinoo qinau. Maa fuka Yuda maqannaasa Yeerusareendari qumuraasa qiniara sia fainanduqirausa faqa narana naidanoommifoo qifoo qimasee rakeemasee aadumai ooqu marifinoo nari narana nanau. Yuda maqannaasa Yisuna ufa irimarusa misakiqari akaqausa aanaamuru marusara maaqi qiqau.

¹³ Yuda maqannaasa qikaqaafasaa uqa Peetooroona faqa miqoo marusa Peetooroona oosana qafamasee misa faqa miqi kai iqa Yeerusareendari qumusara rufiamareeqa Peetooroofa ooqu marutinai ooqu marifiqa nari narana naqau. Misa sandeeqa Baranabasina faqa firarisameeqee nari manda maparaa iranaki quqasoofanoo aadumai ooqu marifi nanau.

¹⁴ Qinee misa miqiu oosanna qafamaseeqa maaqi qiqiafana, misa sia amiqira fasaasa ufa anoona ufamau andeeqasee fidaqa eendaandammida miqi mariafanoo, miqi qimasee Peetooroona aiqamausa nifusaa afusaa aqiqiafana, anee Yuda maqannaafa mariananoo aanaamuru oosana marasee aanaamuru faqa moodaanaki mariananoo, anee nanaree maqee aanaamuruara asaurusee rakeemasee aadumasaa ooqu

marinanee. Anee miqiannana aanaamuruara sia fee amanaikinanee miqinanee. Anee aanaamuru mareegeenana Yuda maqannaasaki quqasainaga innaarunai firana amanaikidee miqidanee.

Yuda maqanaasa faqa aanaamuru faqa Yisunasaqaraana asumu mareefaranoo.

¹⁵ Qinee miqi qimasee Peetooroona aqisee maaqi qimasee aqamausa qimannimiqa. Kuqaa maasa Yuda maqannaaki kambiqaraisa mari-daqa. Maasa sia aanaamuru mariasa, misa Anutuna ufara sia irirai mana mana imariasa.

¹⁶ Sia maasa Mooseena sandufasaaqari firannai Anutuna innaarunai firana amanaikiranaki keeqaanaura, asauku mundirana Yisunasa rusiranannai kai Anutuna innaarunai firana amanaikiranaki keeqaanaura. Sia faiqi moo fannoo Yuda maqannaasa sandufannai Anutuna innaarunai amanaikiranaki keeqaannoo.

¹⁷ Maasa Yuda maqannaasa Anutuna innaarunai amanaikiranaki keeqararee qimasee asauku mundiranasaa atooqafiqa quandakiqa boo aanaamuru mariasa naanna ramafiqa mandoosana maree marunausee qianauroo. Maasa miqidaqa asauku mundira fee maasa mareeqee mandainainaki quqeenoo fee qianauree.

¹⁸ Oo sia uqanna miqinoo maridanoo. Qinee Pauroosa Mooseena sandufannai Anutuna innaarunai amanaikiranaki keeqaranara qaoo qimarunasa maridaqa, qinee maqee quandaki

minara eedoo qiqa Mooseena sandufa ruki-aanaura.

¹⁹⁻²⁰ Mooseena sandufara qinee maaqi qianaura doo mifa qini aaqarana qimaqiminoo darusaifaqa kuqiqa maridee qidaqa. Qinee Anutuna saikara findifi minaki mariaqeera qini darusaifaqa kuqiara foora iqa maridaqa. Asauku mundirafa auniriranasaa kuqinoo qinee faqa minandiri kuqiara foora iqa maridaqa doo maqee sia qeeqaraa kasida maridaqa, asauku mundirafa qini daundurairi marinara kasida maridaqa. Qinee maa maqee kasira marirafa Anutuna amaaku maqee maqee saqarikidaqa maridaqa, mifa qiniara amuqusinoo nari marirana quqanau.

²¹ Qinee Anutuna idaaqira kaqi nimirana qimifaqa sia qaoo qimasee minnisaanaura, faiqi moo fannoo Mooseena sandufasaaqari Anutuna innaarunai amanaikiranaki keeqainanara asauku mundirafa fifau kuqinuu maqi qidaqa.

3

Nimaarusiranara faqa Yisunasaa rusiranara faqa Pauroofa mi ufa qandara qidanoo.

¹⁻² Oo Karatia maqannasa innee furufari marisa yafee inni mandirirana naakunimaqeenoo fee Yisunasaa rusirana afainoo fee. Qinee Pauroosa inni Karatia maqannaasa nifusaa asauku mundirafa aunirira saqarisaa kuqunara amiqimasee kooroomasee inni nifusaa qimannimi-afanaqa inni nifusaa kuqinoora fooqaana innee amiqimasee irimariafanoo, doo maa moodaa

ainainara kai irammirianaqa qimaqimiaqa, innee Mooseena sandufa maraqa nuana minannai fee Anutuna maraƣuna maraaqee iqau, Yisuna amiqira fasaasa ufa irisee irirana minasaa rusiranannai fee Anutuna maraƣuna maraaqee iqau, minasaa irirana rusiranannai kai maraƣau.

³ Innee naqiaqooqari fee firaa furufariranaki fi fee, innee Anutuna maraƣuna naakusee minannai oosana arasee andeeqasee fidaqa kafa maqee mariaqooqari nanaree innee mina afaimma quqasee faiqí faiqi iriranamau maqee maaqooqari fidee.

⁴ Indaaru Anutuna maraƣuna inni naakufufaqa amiqira oosana inniki kambiqafinau doo maqee innee minara fifau ainainee fee qidaqee. Sia fee innee minara iriafanoo nimuqusidanoo fee.

⁵ Anutufa narí maraƣuna afaaramasee inni maqee maqee nimidanoo faiqí sia auquaqa ira ainaina auqimarifaqa innee qafee mariafanoo. Innee Mooseena sandufamau fimarianara Anutufa narí maraƣuna inni nimidanoo fee amiqira fasaasa ufa iriqa irirana minasaa rusimarianara Anutufa narí maraƣuna inni nimidanoo fee. Minannai kai narí maraƣuna inni nimidanoo.

⁶ Oosana aroo ufafa irirana rusimarianara maaqi qidanoo Abarahaamana auqu ramasee mina kikiqusinoo maaqi qidanoo. Ooqai Anutufa Abarahaamana nauraiqi marufanoo qimaminau.

Abarahaama anee faiqi siaifa mariananoo
 anee moomoo maqusanaasa nikoofa
 marinnaranoo.

Abarahaamafa mina iriseenoo oo kuqaa kam-biqaannoo qimaseenoo narí irirana Anutuna ufasaa rusisee afaaqa quqasee marinau. Anutufa Abarahaamafa narí irirana Anutunasaa rusisoona qafamaseenoo minara maaqi qinau. Oo doo Abarahaamafa qini Anutufa innaarunai firana amana kai mari fasiqafa maridanoofee qinau.

⁷ Qinee Pauroosa minara maaqi qidaqa innee Karatia maqannaasa amiqimandee maana iriaqa. Kuqaa Yuda maqannaasa Abarahaamana maqasaaqaraa ati mina moodaa maqannaasa mariafanoo Anutufa Abarahaamana atiara moosee qidanoo maaqi qidanoo. Abarahaamana aanna reemariasa Anutuna ufasaa irirana rusimariasa misa kai Abarahaamana aiku asauku anoona uqanna maridaqa.

⁸ Anutufa ooqai indaaruu aanaamuru maqannaara nári irirana Anutunasaa rusinausa Anutuna innaarunai firana amana keeqeefandiafoo qimasee akara rumaqoofa maaqi qinau.

Anutufa ani Abarahaamanasaaqari aruruki akinanoo aiqama maa maqa maaqana afaaqasasa mariasa amiqi amiqimma nimaqaannoo fee qimaqoofa maridanoo.

⁹ Anutufa qufanoo Abarahaamafa mi ufana nariara irisee doo kuqaa fee qunara Anutufa Abarahaamana amiqi amiqinai. Doo maqee aukuna miqi kai iqa aiqama irirana Anutunasaa rusimariasa Abarahaamanasaaqaraa amiqi amiqirana Anutufa raina nimidanoo.

¹⁰ Aiqama maqannaasa Mooseena sandufamau fidaqa minannai Anutuna innaarunai firana

amanaikidaqa keeqaanauree qimariasa
aaqamaki Anutuna niqurararufa nimaarusirufa
ameemaanai maridaqa.

¹¹ Tamummaqara fasiqauqa akara minara
maaqi qinoo maridanoo,

Anutunasaa irirana rusimarianannai Anutuna
innaarunai firana amanaikiranaki kee-
qeemariasa misa kai maqee oosana arasee
naaru marirana mareefaranoo.

Maasa mina irisee maa ufanara kooroo ifoo
qidaqa sia faiqi moo fannoo Mooseena sandufa
mararanannai Anutuna innaarunai amanaiki-
ranaki keeqaannoo.

¹² Mooseena sandufa sia Anutuna saqarikirafa
minasaa mundinoo maridanoo. Mooseena san-
dufa fannoo faiqi minasaa kaaqa andeeqasee
firafa minasaa mundinoo maridanoo. Tamum-
maqaraura akara minara maaqi qidanoo,

Mooseena sandufamau kaaqa andeeqasee fimar-
ifa kai naaru mariranaki keeqaannoo fee
qimasoofaqa maasa sia amanaikidaqa sia
keeqaanaura.

¹³ Asaku mundirafa Mooseena sandufamau
fimariasa Anutuna niqurararufa ameemaanai
rumbaqa marunara iriseenoo asaku mundi-
rafa nari kai Anutuna niqurara ufaikamambi-
noo maasa daaqa qumureenoo minaki rumbaqa
marusa idukuqisanau. Tamummaqara fasiqauqa
akara minara maaqimminoo maridanoo.

Saqarisaa dirifi kuqimariasa aiqamausa Anutuna
niqurararufa ameemaanai mariasa mari-
daqee qidanoo.

¹⁴ Asaku mundirafa saqarisaa dirifi kuqinau.
Anutufa ooqai Abarahaamanasaaqaraa amiqi

amiqirana aanaamuru mariasa nimianiffee qimasoofanoo asauku mundirafa saqarisaa dirifi kuqinau. Asauku mundirana Yisunannai aanaamuru mariasa Anutufa Abarahaamanasaa qima afeekaikira amiqi amiqirana misa faqa raina mareefaranoo. Maasa faqa qeeqa Yisuna saqarikiranannai Anutufa narí maraquna nimiraree quna faqa maraanaura.

Nimaarusira ufara faqa qima afeekaikira ufara faqa Pauroofa qidanoo.

¹⁵ Oo qini qikaqaafasaa uqa maasaki mari ainaina kikiqususee qianaورانoo. Faiqí qaaraqanda moo ainainara qimasee qima afeekaikamasee mi ainainna papiqasaa akara rumasee nariqara nuqu minasaa akara rumasee sia amana mi ufana minniseefara, mi mau kai fifaranoo.

¹⁶ Miqi kaimmasee Anutufa narí qima afeekaikira ufa Abarahaamanasaa faqa mina atisaa faqa quqaseenoo akara rinau. Ooqeenaa akara fannoo sia narí atiuqa moomoo fasiqa anaaseera qidanoo. Mifa maaqi qidanoo, ani ati kaimma qima afeekaikirana amianauree qidanoo asauku mundiranara moodaara qinau.

¹⁷ Qinee Pauroosa minara maaqi qidaqa Anutufa Abarahaamana narufa amiseenoo doo qinee mi mau kai fuanaureeqimasee qimafeekaikinau. Miqooqari (430 aukwana) aukwana moomoo uqanna aiqara mafufanoo Mooseena sandufa fannoo kasooqagee innaaqiana kambiqafinoo sia amana Abarahaamana qimamu ufana rafaqa-fuannoo kaqi mariannoo.

18 Anutufa Abarahaamanara Kannaa maqa maaqakinaa saqama namufaqa faiqi namufaqa aiku asauku namufaqa amiraree qimasee Anutufa mi maqa maqa saqamana Abarahaamafa narí sandufamau funara sia irirai oogai narí qima afeekaikammaqoo iriranasaa narí afaari-noo aminau.

19 Maasa minara irisee Anutufa naqiraree sandufa Mooseena aminoo fee inau. Mooseenakiqari fiufufanoo Anutufa qima afeekaikira ufa qimamufa Abarahaamana ati anoona uqanna kambiqaaninanaki Mooseena sandufa taikaanoo. Mi qambaana kamusaqanna aaqarana kooroomma nimaqaanifeera Anutufa mi sandufana quqanau. Anutuna qangiroouqa mina sandufa Mooseena amufanoo Mooseefa Anutuna faqa maqasaa fasiqa faqa aanaiqikinoo maridanoo maqasaa narí aqoonausa niminau.

20 Anutufa sandufa quqemarufa faqa faiqi anaasee mi ufamau fimariasa faqa marianara aanaiqikirafa Mooseefa mina qambaana maridanoo. Abarahaamana qima afeekaikirana amuaukuanafa sia miqinoo maridanoo. Abarahaamafa sandufamau firafa sia marunara aanaiqikirafa faqa sia marinau. Anutufa nariara qima afeekaikira ufannoo Abarahaamana qimaminau. Maasa minara uriqarara oosanee qidaqa.

Nimaarusira ufa oosanara kooroo idanoo.

21 Maasa minara iridaqa Mooseena sandufa fannoo Anutuna ufara qima afeekaikirufa Abarahaamana amunafa rafaafidanoo fee qianau-

ree. Sia amana rafaafa fuannoo. Mooseena sandufa oosana maaqimminoo maridanoo. Faiqi anaasee Mooseena sandufamau fidaqa mina aki-aqara sia amana naaru marirana mareefara. Miqira sandufa Anutufa sia nimirau. Niminaqau mi sandufana mareefau innaarunai fini.

²² Ooqeenaa akara fannoo aiqama maqannaasara nari mandoosana afeeka ameemaanai kuridiranaki maridaqee qidanoo. Qinee Pauroosa minara maaqi qidaqa Yisunasaa irirana rusimariasaa Anutufa nari qima afeekaikamandee maqee oosana arasee naaru marirana nimiannoo fee qidaqa, mi nimirafa asauku mundirana Yisunasaa rusimarianasaa mundinoo maridanoo. Aiqama ainaina nari mandoosana afeeka ameemaanai marianara Yisunasaa irirana rusimarianannoo kai aikaquannoo.

²³ Yisuna saqarikira aukuaana sia maruqoo Mooseena sandufa fannoo mina afeesidanoo maasa karabusara foora rumbaseenoo maramareenoo Yisuna saqarikira aukuaana kooroomambufanoo minaki quqaqisanau.

²⁴ Asauku mundirafa qumuaninna aukuanasaa Mooseena sandufa fannoo maasa uqanifiqara fasiqara foora marinoo maasa Yisuna saqarikiranannai Anutuna finnai innaarunai firana amanaikiranaki keeqaaqeeru maasa nifiqamaree asauku mundirana aaqa munu qisanau.

²⁵ Doo maqee Yisunasaa rusirafa ani maridanoo ooqai uqaqifiqee marufa Mooseena sandufa sia maqee rakisi nimaqaidanoo.

²⁶⁻²⁷ Innee aiqama Yisuna saqarikiranannai

asauku mundiranaki keeqafi marianara Anutuna amaaku kamambi marianara innee inneeqa nammari maroonannai innee asauku mundirana andeeqara marirana qamunnara foora akumaree minaki fuaqa.

²⁸ Doo minakiqari sia Yuda maqannaasa faqa aanaamuru faqa naaduma moo kiqa maridaqa sia karabusa ainaini mariasa faqa idukiraua faqa moo kiqa mariafanoo sia faiqi faqa anaasee faqa mookiqa mariafanoo amana amana kai mariafanoo. Innee aiqama asauku mundirana Yisuna faqa moodaanaki maridaqa aiqamausa amana amana kai moodaa mariafanoo.

²⁹ Innee asauku mundiranaindi marianara Abarahaamana ati mariafanoo. Abarahaamana atiuga marianara Anutufa Abarahaamana amiqi amiqirana qima afeekaikuna mi amiqi amiqira ainainna kasooqagee innaarunai inni faqa nimirannoo.

4

(Ooqai Pauroofa maru aukwana ainaina faqaasa faqa pisinisa faqaasa faqa munnimmara ainainimariasa faqa kudiuga faqa mariqau. Ainaina faqaasa faqa pisinisa faqaasa faqa nari ainainirana moomoo marifaqa sia amanaikifaqa akaqa fasiqauqa nifiqee nari ainainiranaki quqasee mina akiaqara munnimma nimimariqau. Moo oosana faqa misaki marinau. Kudi fasiqauqa akaqausa kaaqa kudiki mariasa naararee marifaqa marianara ainaina faqaasiannai oonuree irairanoo ainaina faqaafa ainaina siaina karabusara foora ira saikiranaki quqaseenoo sia feefauru

aminau. Kaqi narana faqa faiqarana faqa mina ainainirana akiaqara amiseenoo feefauru uqanna sia aminau. Misa minara karabusa saika imarusee qimariqau. Mi karabusa saikanaki maru fasiqana ati mina ainaina kafaa mi fasiqana idukiraree qimaseenoo munnimma fraatia aqusee idukumaree fimariqau.)

¹ Mi ufanasaa ootupammasee maa ufana ainainafaqaafa faqa narí amaakuara faqa qimannimianaura. Faiqí moo fannoo kuqufinanoo mina faiqi mina aiqama ainaina maraanoo. Mina akoofa kaqi maru kamuqoo mina faiqi sia innooqanoo marufanoo kaqi narí akoona ainainira faiqiara foora maridanoo. Narí akoofa narí amaakuara narí ainainira faiqiara foora marifanoo saika ummaqirana dadaaqi marinara narana aandau amidanoo. Narí akoona aiqama ainaina maraaninafa maridanoo kaqi fifau ainainira faiqiara foora narí akoona faqa maridanoo.

² Mina faiqi kumaaraa marifaqa mina akoona ainainira faiqiuqa mi faiqina faqa mina akoona ainaina faqa rakisiqa fifi ifaqa mina akoofa doo innooqee maqi qimasaifanoo mi faiqifa ainainasaa rakisidanoo.

³⁻⁵ Miqi kai iqa maasa sia innooqeera fooqaa ira kamuqoo maasa maa maqa maaganasaaqaraa irira sandufa ameemaanai mariqiafana. Anutufa maa aukuanara andeeqara aukuanee qimaseenoo narí amaaku aqiqanau. Aqiqamaseenoo maasa Mooseena sandufa ameemaanai mina rumberanaki mariusa minakiqari feefauru aquseenoo

idukusoofaqa findifiqa Anutuna amaaku kamambi mariaqeera Yisufa maa maqa maaqanasaagaraa anaasee aranandaki rumafufanoo maqasoofanoo Mooseena sandufa ameemaanai maa maqanasaa kambiqafi marinau.

⁶ Anutufa inniara mina amaaku fee qiaqeera qimaseenoo nari amaaku maraquana inni nimuqusaki aqiqoofanoo keeqafi maridanoo, mi maraqunafa inni dadaaqifaqa innee faiqi aanaaqiara fooqaana Anutunara qini qikoo fee qimariafanoo.

⁷ Miqinara innee sia maqee fifau ainainira faiqi marifaranoo, innee faiqi faqa anaasee faqa kuqaa Anutuna faiqi araamuqmaakaikammafi mariafanoo. Doo marifanoo nari amaaku amian-innana innaarunai mari saqamana mareefandin-ausa mariafanoo. Anutufa nari kai qifaqa innee mina amaaku araamuqmaaka mina innaarunai mareefandinausa mariafanoo.

Pauroofa Karatia maqannaasara kaaqammiri-marinau.

⁸ Ooqai innee Karatia maqa maaqaki marusa sia Anutuna aqa oonuree amiqimasee irimariqau afaanna ainaina sia Anutunaki maru ainaina innee mina rumbaranaki mariusa mariqau.

⁹ Doo maqee uqanna Anutunara irimariafanoo, Anutufa faqa doo inniara faqa iridanoo. Doo nanaree innee miqooqari kafaa quandaki kafaa manda umooqukira kuquaqaaira maqasaa irirana innai faqa inniqa nauraa manda sandufa

innai faqa quandee fee. Innee Anutuna faiqiki-ranakiqari quandaki fifau maqasaa irirana rumbaranaki fidee miqidaqee. Saina Yisunasaa rusirafa kai mariaqaana.

¹⁰ Innee Karatia maqannaasa kaaqa Yuda maqannaasa oosana oosana sabata faasaanara rimariasa mariafanoo aaqaida miqi mariafanoo. Kaaqa inni moo quqoonara naaquqaiifaqa Anutunara iri maria quqoona fee qimasaida minara kai irimariasa mariafanoo. Aukuanara faqa qambaana saqannara faqa kaaqa minara ridaqa minannai innaaruna aana maraanauree qidaqa aaqee mariasa mariafanoo.

¹¹ Qinee Pauroosa inniki marunausa inniara rufiidaqa. Inniki ainainiafanafa fifaunni maqasaa rairaa idanoommi maqi qidaqa.

¹² Oo qini qikaqaafasaa mariasa inniara afeekaikamandee qimannimidaga. Qinee Pauroosa Yuda maqannaasa mariaafanausa maridaqa misa oosana faqa Mooseena sandufa faqa minnisee aanaamuru naanna ramasee Yisuna saqarikammasee mina ameemaanai maridaqa. Innee faqa miqi kai iqa qini daanna reeqa Mooseena faqa Yuda maqannaasa faqa sandufa minnisee Yisuna kai saqarikiaqa.

¹³ Qinee aaqee indaaru amiqira fasaasa ufa inni qimannimifanna oosannara irimariafanoo, qinee aurida mariafannanara inni maqa maaqaki kisaagasaa maridaqa qimannimiqiafana.

¹⁴ Qinee auruafanaqa qiqafee sia qiniara nikooqoofaqa qini mandaikamaqisasee

minniqisaqau. Qini aurirafa firaqoo inni narufaqa minniqisaaneerusia sia minniqisaqau. Idaaqa kai maqisee marufaqa mariqiafana. Innee qiniara Anutuna qangiroora foora mari ifoo qimasee qini qumaraqau. Innee asauku mundirana Yisuna qumaroondeemmiqa qini qumarasee amiqi amiqimmaqisaqau.

¹⁵ Mi fasannai innee firaqoo qiniara asasi-mariqau, maqee naqi fee ifaqee sia miqidee. Inni ooqai mariranara maaqi qidaqa innee firaqoo qiniara qimudao qimasee qini dadaaqiane qimasee inneeqa firaa uriqarara ainaina kaqi qimuqini inneeqa nifu faqa pitaqimeeqee kaqi qini qimuqini.

¹⁶ Doo maqee Yisuna anoona ufa qiman-nimunnannai fee qini namuqaa kamambi maridee. Oo sia miqifanoo andeeqaannoo.

¹⁷ Akaqa fasiqa anaasee aaqee mariasa inni faqa ani maridaqa moo unna ufa qimannimi mariasa inniara unna qimasee firaqoo ridaqa amiqi amiqidaqa ueeqaidaqa sia amiqira iriranarau miqidaqau, misa inni mara mareeqa qini Pauroosasaa qaraana rakee iaqeeru miqidaqa, misa irirafa innee iannai ubeekanoo marifaqa inni iriranara nari iannai ubeekamasee misa ufa iriaqeeru miqidaqa.

¹⁸ Akaqausa inni rarisamaseeqa inneeqa irirana misasaa atooqara oosanafa qaaraikaminoo maridanoo. Moo mandoosana moo amiqira oosana maaqimminoo maridanoo. Misa inni rarisamasee misa manda oosana maraaqee qira oosanafa mandoosana maridanoo. Misa inni rarisamasee amiqira oosana maraaqee qira

oosanafa amiqira oosanafa maridanoo. Ooqai qinee Pauroosa inni faqa mariafanaqa inni irirafa qinisaa atooqafi innee qiniara ridaqa mariusa mariafanoo maqee nianai marunaqa innee qiniara minnisee unna ufa qimariasara kai misara kai rimariafanoo.

¹⁹ Qini faiqi namu qini qimuqusimaria faiqi namusa mariafanoo. Anaasee moo fannoo faiqi aanaaqi maqaidanoo aupuraidanoo maqaidanoo. Qinee miqikaimmasee amiqira fasaasa ufa inni qimannimisee asauku mundirana andeeqara oosana marirana nirana inniki kambiqaanifeera inniara aupuraidaqa qimannimidaqa.

²⁰ Oo qinee maqee nianai maridaqa inni faqa mariaqaana nianai maridaqa inniara amiqira irirana iriaqaana kaaqa inniara daunduraki umaara raidanoo.

Pauroofa Abarahaamana aanaaqaqara kikiqusufa.

²¹ Innee indaaru Mooseena sandufakiqari idukufi Yisuna ufasaa atooqafi mariaasa maqee Mooseena sandufa ummaara ameemaanai munari minari kafaa keeqararee qimariasaa mariafanoo. Innee sia fee mi sandufana iridaqee minaki kaifaa keeqaidee.

²² Mifa maaqi qidanoo, Abarahaamafa qaara faiqi maqoofa maridanoo, moo indaarugaa faiqi anoofa ainainira anaasee rumberafa marinau, moo faiqi inaaqiannaana anoofa idukira anaasee Abarahaamana anaqa uqanna marinau.

²³ Abarahaamana amaaku Isamaeerafa rumbera anaasee faiqi marinau, faiqi anaasee

imarundee inoo kai faiqi maqanau. Idukira anaasee Saraqana faiqi aadumasaa kambiqanau Anutufa qima afeekaikamasoofanoo Saraqafa qaafa anaasee asooqa maridanoo Abarahaamana faiqi maqanau.

²⁴ Mi anaasee qanda qaara irirana kikiqammusiqa maridaqa. Moo Qakaarafa Sinai aaqanasaa kambiqara anaasee marifa marifaqa mina faiqi namu Mooseena sandufa ameemaanai rumbaranaki kambiqarausa maridaqa.

²⁵ Qakaarafa Arabia maqa maaqaki mari aaqanna kikiqammusinoo maridanoo maqee maria Yeerusaree maqusa kikiqa faqa usinoo maridanoo mi maqusana faqa mi maqusanaki maria fasiqa anaaseesa faqa rumbaranaki Mooseena sandufa nimaarusira rumbaranaki maridaqa.

²⁶ Abarahaamana moo anaasee Saraqafa sia rumbara ainainira anaasee, sia Mooseena sandufa rumbaranaki marifa idukira anaasee marifa maasa Yisunasaa rusimariasa ninoofa uqanna maridanoo. Mifa innaarunai fuka Yeerusa-ree maqusara foora Yisunasaa rusimariasa firaa maqusa misa ninoofa uqanna maridanoo.

²⁷ Ooqeenaa akarakinaa idi fannoo Saraqanara maaqi qidanoo,

Innee faiqi siai anaaseesa asasiqa, faiqi siai anaaseeuqa sia aupurarana faaqarimariasa, doo maqee innee اساسانارا کای فاقارواقا. آفااقي minnisai asooqa adeedaana, nifaaqi faqaasa uraaqaramasee moomoo faiqi maqaannoo.

(Abarahaamafa Isamaeerana anoona mifinnai oori ukeekeenoo nari anaaga uqanna Saraqarana mafi ameesuqusoofanoo mariufanoo mifa faqa asooqanamuki Abarahaamana faiqi uqanna Isakeena maqanau. Minara faiqi minnisainna aanaaseefa faiqi moomoo maqeenora foora firaaqoo asasiannoo fee qinau.)

28 Qinee Pauroosa minara maaqi qidaqa. Saraqana amaaku Isakeefa Anutuna qima afeekaikira ufasaa kambiqanoo marinau, doo maqee innee qini qikaqaafasaa miqi kaimmasee Anutuna ufasaa mina faiqi namu kammambiqama mariafanoo.

29 Mi aukuanna Isakeena aukuanai faiqi anaasee undee mandoofanoo kambiqoofa Isamaeerafa quandakinoo Anutuna maraqunannai kambiqoona Isakeena mandaikammamaqanau, doo maqee faqa mi oosanafa miqikaimminoo maridanoo. Mooseena sandufa ameemaanai mariasa inni aana ititaidaqa.

30 Ooqeenaa tamummaqara akara fannoo minara maaqi qidanoo, Rumbara anaasee faqa nari faiqi faqa aqiqamasaina moosaa fifuani. Rumbara anaasee amaaku Isamaeerafa idukira anaasee amaaku Isakeena faqa sia mina akoona ainaina moodaanaki maraani.

31 Doo minara qini qikaqaafasaa inniqasaimbaqa sia rumbara anaasee faiqi namu maridaqa idukira anaasee faiqi namu maridaqa, Yisuna idukiranaki maridaqa.

5

Pauroofa idukiranaki mariasara amiqimasee rakisi qumaraaqee qufa.

¹ Asauku mundirafa Mooseena sandufaki-naana idukueeqee narí idukiranaki quqaqaifaqa maasa minaki maridaqa, doo minara iriseeqa idukira fasiqara foora doo minaki mapukusee maridaqa sia kafaa sandufa oosana oosana rumbaranaki firaree qiaqa.

² Innee maana iriaqa qinee Pauroosa qimannimidaqa, indaaruu innee asauku mundirana saqarikiqau. Kafaa maqee moo fannoo inniara Yuda maqannaasa fainanduquseeqa Yisunasaa ookaamambaqa innaarunai fuagee qinaqa innee miqifanoo Yisufa sia amana inni dadaaqiannoo fifau ainainara foora mifa maridanoo.

³ Qinee kafaa qimannimianaura afeekaikam-masee qimannimianaura moo fannoo inniara Yuda maqannaasa fainanduquaqee qinaqa fainanduquseeqa Mooseena sandufa ameemaanai doo minaki oonuraafanoo sia Yisuna namufaqa fuaqa mi mau kai fuaqa.

⁴ Mooseena sandufannai Anutuna innarunai amanaikiranaki firaree qimariasa doo Yisunasaqaraana doo inneeqa atekaseeqa mariafanoo Anutuna kaqi afaarinoo nimiranasaqaraana aqoosai mariafanoo.

⁵ Maasa sia miqidaqa sia sandufasaa ookaaidaqa, maasa irirafa Anutunasaa kai mundiqa maridaqa mifa narí kai maasa mareeqeenoo narí innaaruna amanaikiranaki quqaqiseenoo fee qimasee irirana minasaa kai rusisee maridaqa. Inniqasaimbaqa Yisuna

saqariki marunanoo Anutuna maraquna fannoo minasaaqari maasa dadaaqifaqa maasa Anutuna innaarunai keeqaannanara اساسامندee afeesidaqa.

⁶ Maasa asauku mundirana Yisuna faqa moodaanaki maridaqa Yuda maqannaasa fainanduqirana faqa sia fainanduqirana faqa miqanda fifau ainaina maridaqa. Anoona ainaina maaqimminoo maridanoo. Nariara nariara uriqarara ainainee qimasee nariara nariara amuqusirafa inni Yisunasaa rusirana akooroo imarifa mi ainainafa anoona uqanna maridanoo.

⁷ Oo Karatia maqa maaqaki mariasa innee amiqimasee mi mau fimarusa mariafanoo, nana-ree innee maqee anoona ufa minnisee mandosana maree fee.

⁸ Anutufa inni naarammeeqee Yisunaki quqee marifa mifau inni mareeqee kaqi runna quqeenooofau.

⁹ Faiqí moo fannoo adudu fooqaafa inni qambaanai moodaa mari ifa mifa kai aiqamausa radiqifinoo inni nifaaqai sukaqamanni-maqaiifaqa aiqamausa kaqirunna firaridaqa.

¹⁰ Qinee Pauroosa inni Karatia maqa maaqaki mariasara andeeqara aatata firanara iridaqa, maridaqa. Maasa inni faqa karaambaiqasaa atooqa marirafa qini qifaaqa quqarana qimidanoo, inniara sia moo iriranamau fifaranoo fee qidaqa inni mara moo aatata ubeekee mari fasiqausara qinee sia iridaqa, Anutufa misa naru-annoo fee qidaqa.

¹¹ Oo qini qikaqaafasaa uqa qeeqara

qimannimianauranoo qinee Yuda maqannaasa fainanduqira ufa asauku mundiranasaa ookaammasee minannai innaarunai firaree qimariana mi ufana maqusa maqusa qinee qimannimi marianaqau misa sia maqee maqee qini darimariaqini. Fainanduqira ufa Yisunasaa ookaairafa anoona marinoofau qinee asauku mundirana aunirira saqarisaa arunara qimannimianaqau sia daruqini. Yisunasaa mundirunara kai qimannimimarunaqa iridaqa darimariafanoo.

(Misa mi aukuanna faina kafaqianda uqidee qimasaida Yuda maqannaasa maasa Anutuna faiqi namu fee qimariqau. Nifaandama itirausara inni nianasaa naadumasaa mariaqee qimariqau. Pau-roofa minara irisee maa ufana qimanniminou.)

¹² Inni Karatia maqannaasa mareeqee moo aatata quqemariasara qidaqa misa nári fainanduqiranara kai qidaqa nári nifaandama itirana faqa minaki ookaammaseeqa doo naadumasaqanna maridaqa sia aaqaranaki inni fuki faaki qima quqaaqeera.

¹³ Oo qini qikaaqaafasaaauqa inniara qinee qianaara. Innee inneeqa mandainaina rumbaranaki mariafanoo Anutufa minakinaana inni naarameeqeenoo Yisuna idukiranaki quqeenoo. Doo innee minaki maridaqa inni nifaaqa manda nidimari ainainafa sia quandakinoo innisaa rakisidanoo inni nikaruqiranannai minni ubeekamannimaqaani. Sia miqiaqa maaqiaqa inneeqa nariara nariara rirafa nimudao qirafa inni nifiqeeqeenoo nariara nariara dadaaqiranaki quqaani.

14 Mooseena sandufa aiqamatia maa moodaa ufanaki anoona kambiqaidanoo, mi ufafa maaqimminoo maridanoo. Innee inneeqa niqoonausara inniqa nifaaqara foora nidinaqa dadaaqa.

15 Innee aandaara foora narí aidafirana narí aidafirana narí ukaqami narí ukaqami irana narí ami narí ami idaqa rufiaaqa qusaasa innee narinni narinni naru taikaseefaara, minara nariara nariara nidiranara qidaqa.

Pauroofa maqasaaqaraa irirana faqa maraquna irirana faqa miqandara qimaqoo ufafa.

16 Qinee Pauroosa minara inni qimannimidaqa. Sia innee inniqa maqasaa irirannai ubeekaaqa. Anutuna maraquna fannoo inni naakinoo marifa maqee maqee inni naaqooki amiqira oosana maraaqeera qimaseenoo mandosanara aaquqidanoo. Innee mi ufamau fiqa sia uqanna inneeqa maqasaa iriranamau fifaranoo.

17 Maqasaa fasiqa anaasee maqasaa irirafa faqa Anutuna maraquna aidimari ainainafa faqa maasa naunduraki narí maqauruamaqee narí maqauruamaqee idaqa miqanda namuqaa marianara innee firaree qimariaqoo sia amana fifaranoo. Minara innee Anutuna maraquna ufamau fuafa.

18 Anutuna maraquna fannoo inni rakisifaqa innee sia Mooseena sandufa ameemaanai marifanoo.

19-21 Faiqí faiqi maqasaa irirana oosana kaqi akooqoo maridanoo. Mina oosana maaqim-masee kooroidanoo, faiqí anaasee narí um-

muari narí ummuarirana faqa adi namuafaqira oosana oosana faqa irirana siaisa furufarida kaqi mandainaina maraqaanuana faqa saqarinai unnaqira Anutuna amana auqusee irirana mina amimariana faqa aukainaina ufaaqa afaanainaina maraqaanuana faqa, faiqí anaasee namuqaa kirana faqa rakirana faqa rairaiqirana faqa qusufa qimasee aanooqirana faqa, aiqama ainaina náriara kai fatusimariana faqa, naadu naadu rakeekaammasee nariqa kai naadu naadu suqimariana faqa, nariara nariara rairai qimariana faqa nammari namasee furufarirana faqa, misa suqufifaqa oosana oosana mandoosana uqeeree mariana faqa oosana oosana mandoosana maraidaqa. Qinee ooqai aaquqima nimaqaafanausa kafaa maqee faqa aaquqimanimaqaidaqa, mi oosanna maree mariasa sia uqanna Anutuna ququsaki keeqefaranoo.

22-23 Anutuna maraquina fannoo sia miqi maria mandoosanakina uqannifiqaidanoo. Innee mina ufamau fifanoo inni mareeqee amiqira saqari qaqaammara foora ireefaranoo. Maa amiqira oosanausa ireefaranoo, nariara nariara uriqarara ainaina maridee qimasee nariara nariara rirana faqa Anutunara asasirana faqa naunduraki asoarana faqa faiqí aanaaseera reendeenira irirana faqa amiqimandee dadaaqi mariana faqa afaarirana faqa amiqira ainaina afaarirana faqa sia minnisee firafa miqookai marida auqainna ainaina auqaida marirana faqa fisoofoommasee ufa qirana faqa narí mandoosanara akooqamasee andeeqasee

fimarina faqa Anutuna maraquna fannoo mi ainainausa kai uqannifiqaidanoo, sia moo sandufa fannoo mi amiqira ainainausara qaoo qiannoo.

²⁴ Asauku mundirana Yisunaindi mariasa misa nariqa faiqí faiqi irirana marirana faqa nári maqasaa irirana faqa aunirira saqarisaa Yisuna namufaqa kuqa kai aru quqee mariasa maridaqa.

²⁵ Anutuna maraquna fannoo maqee oosana arasee naaru marirana qimimarifa marinara mifa kai maasa marirana nirana rakisiani.

²⁶ Sia maasa qeeqara doori uqeeraseeqa amiqirausee qimasee qeeqa qimooqia sia nariara nariara sukufa qia sia nariara nariara rairai qiaqa.

6

Pauroofa narí dadaaqi narí dadaaqiaqee qimaqoo ufafa.

¹ Qini qikaqaafasaauga inniki moo fannoo mandainainaki aqufinaqa qafeeqa Anutuna oosanara irimariasa mina mareeqee andeeqaranaki quqaaqa, sia aanoomasee miqi iaqa reendenamandee miqi iaqa anee mi fasiqana dadaaqidana aneenna marirana faqa rakisia, anee faqa minaki aqufinafaara.

² Innee narí ummaara narí ummaara dadaaqiaqa, miqiqa innee asauku mundirana sandufamau kaaqa andeeqasee fimariafanoo.

³ Faiqí moo fannoo ureeqarafa nariara uriqararausee qimasee sia qinee oorudupirausa dadaaqianauranoo fee qimarifa narí kai narí akaruqidanoo miqi qidanoo.

⁴ Aiḡama fasiḡa anaasee nariḡa kai nári marirana nirana nári kai amanamasee ḡafaaḡa, sia moo naindisaa amanamasee ḡafaaḡa narikai narí marirana auḡarana amiḡirafa marinanoo narí kai ḡafamasee asasiannoo.

⁵ Aiḡamausa nári umaara nári kai marasee ḡandaki aḡoonausa faḡa dadaaḡiaḡa.

⁶ Akaḡa fasiḡauḡa Yisuna ufa inni ḡimannimi-faḡa innee misa ufa irimariana akiḡara ḡandaki narana munnimma, maaḡa, ainaina naída nimi-aḡa. Miḡidaḡa innee misa ummaara dadaaḡi-faranoo.

⁷ Innee sia inneeḡa nikaru ḡiaḡa, sia innee amana Anutuna afusaa ititasee furufariranaki ḡuḡeefaranoo, mifa maasa oosanara iridanoo. Anee narana asumu ummaḡinana mina kai unakinnaranoo, anee nana mandoosana niminana anee mina kai mareennaranoo. ⁸ Faiḡí moo fannoo narí faiḡí faiḡi manda nidiranannai manda maḡaki ummaḡuseenoo minakinaana kuḡirana kai unakuannoo. Mifa Anutuna maraḡuna oosana marasee Anutuna afuḡaki ummaḡuseenoo minakinaana naaru marirana kai unakuannoo.

⁹ Minara iriseeḡa amiḡira mariranara sia ku-doosaapeeḡa minnisaḡa maasa sia minniseeḡa kaḡi mi mau fidaḡa kasooḡaḡee unnakirana paḡurianaura.

¹⁰ Minara irisee maana ḡimannimidaḡa maasa aiḡamausa amiḡira dadaaḡirana dadaaḡiaḡa sia moodaakari kai, maḡee maḡee dadaaḡirafa kambiqafinana dadaaḡiaḡa. Aiḡamausa dadaaḡi-dana niḡoonausa Yisuna saḡariki mariasa fi-

raaqoo dadaaqiaqa.

Pauroofa taikara aaquqirufa faqa nimandara ufa faqa qimaqoo ufafa.

¹¹ Doo qinee Pauroosa moo fasiqa qimami marunanoo mifa akara ridanoo doo maqee qeeqa kai kirifi qumaree ati rafaqaqafira ufa qeeqa kai firaaqoo akara ridaqa.

¹² Inniki nipatasaa akooqoo mari ainainara kai darara qimasee nimooqimariasaa nariqa nimooqiaqee qimasaidaqa inni fainanduqiranara sandanainai qida miqiaqee qimariasaa mari-daqa. Misa sia kuqaa anoonainainau auqaidau fainanduquaqee qidau, misa asauku mundirana aunirira saqarisaa arunara qimannimi-afaqa mina akiqara Yuda maqannaasa dari-foo qimasee fainanduqira oosana Yisuna kuqiranasaa ootupamasaiifaqa Yuda maqannaasa niranaraqarafa asooaifanoo sia daruaqeer.

¹³ Misa inniara Yuda maqannaafainanduqira oosana maraaqee qimariasaa nári sia Mooseena sandufamau fimariasaa misa inni Karatia maqannaara fainanduqira oosanara eedoo qianara kai nári nimooqiaqeer qimasaidaqa inni fuki faaki qidaqa.

¹⁴ Qinee qeeqara qidaqa qinee maasa karaambaiqa, asauku mundirafa, Yisufa aunirira saqarisaa kuqunara minara kai qinee uqeerasee amooqianauranoo. Mi auniriranasaa kuqunannai maa maqa maqanasaaqarara ainaina kuqinoo mari ifoo qidaqa sia kasidanoo minannai faqa qinee faqa kuqiarara foora qimarunausa marunanoo

maa maqa maaqanakinaa mandainaina sia qini qumaraidanoo.

¹⁵ Fainandugira fee, sia fainandugira fee, sia mifa anoona ainaina maridanoo. Anoona ainaina faiqi anaasee kuqaa naundurakinaafa fukaikamambinaqa andeeqasee marirafa mifamma anoona maridanoo.

¹⁶ Innee mi iriranamau fimariasaa qimannimi-anaura Anutufa naundurairi asooarana faqa Anutufa aidira nifauarana inniki faqa aiqama Anutuna faiqi anaasee maqasaa mariasaki faqa mariani.

¹⁷ Qini Pauroosa rafaafira ufa maaqimminoo maridanoo. Sia moo fannoo kafaa qiniara Yisuna ufara sia andeeqasee qimannimimari fee qifaranoo. Qinee kuqaa uqanna Yisuna karabusa ainainira fasiqa maridaqa Yisuna ufa andeeqasee qimannimifannana akiaqara qini darufa qifaaqasaa qufaanakuru aanaaqi marifa mifa qiniara kuqaa Yisunaindi fee qimasee akoorooidanoo. Misa qini darusaafaqa mi ufaanakurunara Yisuna akarara foora maridanoo, aiqamausa qini qiqafamasee Yisunaindi fee qiaqeera.

¹⁸ Maasa karaambaiqa asauku mundirana Yisuna afaarirafa inniki mariani. Kuqaa.

Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698